



ALIJA
IZETBEGOVIĆ
M U Z E J

NEWSLETTER

JU Muzej "Alija Izetbegović Sarajevo
Broj 2/2022 Mart-April 2022.

IZLOŽBA

U povodu
15. aprila -
Dana Armije
Republike
Bosne i
Hercegovine
....



SJECANJE

*Jovan Divjak,
general i
pomoćnik
načelnika
Glavnog štaba
ARBiH*
....



ALIJA
IZETBEGOVIĆ
M U Z E J



JU FOND MEMORIJALA
KANTONA SARAJEVO



FONDACIJA
ALIJA
IZETBEGOVIĆ

15. april DAN ARMIJE RBiH

Izložba fotografija posvećena
Danu Armije Republike Bosne i Hercegovine



15.-22.04.2022.

Galerija Općine Novi Grad Sarajevo

Članovi i predstavnici Udruženja mladih „Ribariće” u posjeti



Članovi i predstavnici Udruženja mladih „Ribariće” posjetili su 12. marta 2022. godine novoootvoreni ambijent JU Muzeja „Alija Izetbegović” te tom prilikom nas posjetili koliko Bošnjaci iz Sandžaka cijene ličnost i djelo Predsjednika Alije Izetbegovića. Upriličen im je obilazak muzeja sa vodičem, te su upoznati sa audiovodičem kao novim važnim dijelom muzejske ponude.

Prisjetit ćemo se riječi Predsjednika Izetbegovića, ratne 1994. godine: „Mi smo opkoljeni i u Sarajevu smo svi isti, baš svi. Jedina je razlika između onih koji su ovdje u Sarajevu i onih gore koji pucaju na nas. Nikakva podjela nije dopustiva i suzbijajte to! Otiđite, prebrojte mezarove palih Sandžaklija oko Sarajeva, pa će se oni koji prave razdor posramiti”.



Posjeta profesora i učenika STŠ „Kemal Kapetanović” iz Kaknja



Učenici II. razreda Srednje tehničke škole „Kemal Kapetanović” iz Kaknja posjetili su 14. marta 2022. godine sa profesorima JU Muzej „Alija Izetbegović”. Upriličen im je obilazak kroz osvježenu muzejsku postavku koja nudi interesantan uvid u nasljeđe Predsjednika Izetbegovića.

Postavka smještena u starim vratničkim kulama Ploča i Širokac zasigurno zaokuplja pažnju svih posjetilaca. Učenici su, također, upoznati sa novoponudjenim audiovodičem koji nudi detaljan uvid u sve muzejske eksponate.



Predstavnici i đaci OŠ „Glavatičevo”



Predstavnici OŠ „Glavatičevo” sa djecom, upriličili su posjetu 18. marta 2022. godine JU Muzeju „Alija Izetbegović”. Posebno dragim gostima bio je upriličen obilazak muzeja sa vodičem. U razgovoru sa predstavnicima OŠ „Glavatičevo” ukazano nam je na vrijednosti koje se učenicima prezentuju na dnevnoj bazi kroz kurikulum, te edukativne i pedagoške pristupe. Predsjednik Alija Izetbegović je nesumnjivo odgoj i obrazovanje držao najčvršćim fundamentima jednog razvijenog i slobodomislećeg društva.

OŠ „Kiseljak 1” iz Bilalovca u muzeju



Predstavnici Osnovne škole „Kiseljak 1” iz Bilalovca upriličili su 25. marta 2022. mnogobrojnu posjetu sa svojim učenicima JU Muzeju „Alija Izetbegović”. Mnogim učenicima bio je to prvi put da posjećuju naš muzej, stoga nam je predstavljalo posebnu čast i radost, da su imali priliku svjedočiti renoviranom muzejskom ambijentu.

Dobrodošli dragi gosti!

Predstavnici Doma za nezbrinutu djecu iz Bihaća su 26. marta 2022. godine sa svojim štičenicima posjetili stalnu postavku JU Muzeja „Alija Izetbegović”. Bosanska Krajina predstavlja dio naše zemlje od posebnog interesa da rad muzeja, te je i Predsjednik Alija Izetbegović za života isticao značaj borbe krajiških patriota.



Više od **100** učenika **OŠ “Aleksa Šantić”** u posjeti



Tri grupe od preko 100 učenika 9. razreda Osnovne škole „Aleksa Šantić“ su 29. marta 2022. godine posjetili stalnu postavku JU Muzeja „Alija Izetbegović“. Mnogima je to bio prvi put da su u Muzeju „Alija Izetbegović“, te smo imali interesantne razgovore, obzirom da sada kroz časove historije izučavaju period agresije na Republiku Bosnu i Hercegovinu. Učenici osnovnih škola su jedna od najvažnijih target grupa JU Muzeja „Alija Izetbegović“, te nam je od izuzetnog značaja da u toj dobi shvate značaj ličnosti i djela Predsjednika Izetbegovića.



Njeno ime nosi jedna **sarajevska škola** a ona je prva Bošnjakinja **koja je pisala prozu**



Osnovna škola “Nafija Sarajlić” je upriličila posjetu JU Muzeju “Alija Izetbegović” sastavljenu od 60 učenika 9. razreda. Posjetioci su bili oduševljeni postavkom i onime što su imali priliku da vide i čuju.

Učenici su posvetili veliku pažnju razgledanju muzejskih postavki koje im je omogućeno, te panelima i eksponatima koji čine stalnu muzejsku postavku. Također su upućeni u novokreirani i dostupni muzejski audio vodič kao zgodan alat za dalje izučavanje muzejske stalne postavke, te perioda novije historije Bosne i Hercegovine i njenog prvog Predsjednika Alije Izetbegovića.



Predstavnici prijateljske Osnovne škole „Hamdija Kreševljaković“ su u periodu od 18. marta 2022. do 1. aprila 2022. godine upriličili sedam grupnih posjeta JU Muzeju „Alija Izetbegović“. Učenici su bili uzrasta od 10 do 15 godina. Interesovanja su bila različita, znanja koja se se stekla će biti jako korisna.

Cijenimo trud i zalaganje nastavnog osoblja koje pokušava od ranog uzrasta probuditi svijest o značaju nasljeđa Predsjednika Alije Izetbegovića i ideja kojima se on tokom života vodio. Učenici su bili pažljivi i jako nam je bitno da nastave razvijati svijest o časnoj borbi patriota Bosne i Hercegovine.

JU Muzej „Alija Izetbegović“ će uvijek visoko valorizirati rad sa onima koji su naša budućnost. Radujemo se svim budućim posjetama.





Photo: Muzej "Alija Izetbegović"

Izložba fotografija „15. april – Dan Armije Republike Bosne i Hercegovine“

U organizaciji **Muzeja „Alija Izetbegović“**, **Fondacije Alija Izetbegović**, **Fonda Memorijala KS**, te **Općine Novi Grad Sarajevo**, organizovana je izložba fotografija „15. april – Dan Armije Republike Bosne i Hercegovine“, gdje je obilježena 30. godišnjica od formiranja Armije Republike Bosne i Hercegovine.

Prisutni su podsjetili na značaj profesionaliziranja odbrane i uvezivanja patriotskih i odbrambenih jedinica u legalnu, državnu, svjetski priznatu formaciju, koja ja na svojim plećima iznijela teret borbe za opstanak Republike Bosne i Hercegovine u teškim uslovima agresije.

Prisutnima su se obratili ispred JU Muzeja „Alija Izetbegović“ zamjenica direktorice Šejla Cakić – Rizvanović, direktor JU Fond Memorijala KS Ahmed Kulanić, ministar kulture i sporta KS Samir Avdić, te ispred Općine Novi Grad Sarajevo pomoćnik načelnika Tajib Delalić.

Otvaranje Izložbe fotografija bilo je medijski popraćeno. Posjetioci su imali priliku da posjete izložbu između 10 h i 16 h svaki radni dan. Ulaz je bio besplatan.



Ministar kulture i sporta KS **Samir Avdić** i načelnik Općine Novi Grad **Semir Efendić**



Zamjenica direktorice Muzeja "Alija Izetbegović" **Šejla Cakić Rizvanović**



Direktor Fonda Memorijala KS **Ahmed Kulanić**

Izložba fotografija „15. april – Dan Armije Republike Bosne i Hercegovine“ predstavlja historijski razvoj jedne časne Armije, čiji je zadatak bio da brani temelje i principe na kojima je počivala nezavisna, suverena i multietnična Republika Bosna i Hercegovina.

Izložba fotografija kroz edukativni, hronološki i sistematski prikaz, predstavlja razvoj historijskih događaja nakon pada Berlinskog zida i urušavanja komunističkih sistema u evropskim zemljama bivšeg „istočnog lagersa“, te prateći historijske metode pokazuje refleksiju istih tih događaja koji su doveli do disolucije Socijalističke Federativne Republike Jugoslavije (SFRJ).

Posjetioci će imati priliku steći uvid u poznate i manje poznate događaje koji su prethodili agresiji na Republiku Bosnu i Hercegovinu, te organizaciona preslagivanja u tadašnjoj Jugoslovenskoj narodnoj armiji (JNA) koja se sve više homogenizirala i od kraja 1980-ih godina dobijala srpski karakter.



Također se, kroz tekstualne i fotomaterijale, objašnjava put razvoja i profesionalizacije Armije RBiH od početnog konglomerata patriotskih i dobrovoljačkih odreda (Patriotska liga i Zelene beretke) organizovanih na lokalnom principu, preko Teritorijalne odbrane RBiH, do jedne u svijetu respektabilne vojne sile koja je tokom posljednje dvije godine agresije otpočela sa ofanzivnim i oslobodilačkim aktivnostima.

Fotografije koje će biti dostupne posjetiocima, dolaze iz bogatog fundusa JU Muzeja „Alija Izetbegović“ i JU Fond Memorijala KS, i nastale su tokom najkritičnijih godina po opstanak naše države. Fotografije daju autentičan uvid u stanje vojnika i starješina Armije RBiH na raznim frontovima i protiv sva tri agresora koja su napadali ideju Bosne i Hercegovine kao ideju gdje ljudi različitih vjerskih i kulturnih tradicija mogu živjeti zajedno.

Također, JU Muzej „Alija Izetbegović“ će izložiti određen broj eksponata komplementaran temi koju izložba tretira. Posjetioci će imati priliku da vide Predsjednikovu beretku te njegove epolette kao simbole civilnog Vrhovnog komandanta Armije RBiH. Izložbene panele će također pratiti ostali eksponati iz stalne postavke JU Muzeja „Alija Izetbegović“ koji će dati detaljni uvid u odnos pripadnika i starješina Armije RBiH prema Predsjedniku Izetbegoviću, te njegov odnos prema njima.

Predsjednik Alija Izetbegović je u svim mogućim prilikama ukazivao na značaj kojeg je Armija RBiH imala u ulozi odbrane naše države, te je u svojim inspirativnim govorima uvijek na to ukazivao. Značajan dio postavke obuhvata citate Alije Izetbegovića u kojima on spominje Armiju RBiH i njen značaj.

Izložba također donosi i dio koji tretira ulogu žene u odbrani Republike Bosne i Hercegovine kroz razna polja i aspekte. Tu donosimo svjedočanstva relevantnih ljudi koji su svjedočili nemjerljivom doprinosu naših majki, suprug, sestara i kćeri od polja diplomatije do polja oružane borbe.



Donosimo i približavamo posjetiocima, Predsjednikove riječi podrške vojnicima na frontu, te njegove dojmove prilikom tih posjeta. Nakon potpisivanja Dejtonsko mirovnog sporazuma, na petu godišnjicu osnivanja Armije RBiH, Predsjednik Izetbegović je, glorificirajući značaj bosanskog vojnika i njegovu ulogu, kazao:



„Narod se ponosio vama, uvjeren da ste vi najbolji vojnici na svijetu. I jeste. Neprijatelj to zna i ubuduće će tri puta razmisliti prije nego se usudi da dignu ruku na zemlju i narod koji vi branite. Tragična 1992. godina, uz Božiju pomoć, neće se više nikada ponoviti.“

„Braneci Bosnu, vi niste imali čast da branite samo zemlju. Više od toga, vi ste branili jednu veliku ideju koja ima svjetski značaj. To je ideja tolerancije i suživota među ljudima različitih vjera i nacija. Tamo gdje ste vi bili, uprkos svim iskušenjima, ostale su čitave džamije, crkve, katedrale i sinagoge. To je najvažnija vaša i naša pobjeda. Postupajući tako, vi ste osigurali najveći zalag u borbi za cjelovitu i demokratsku Bosnu i Hercegovinu, a to znači za budućnost.“




Tema oružja korištenog kroz razne periode otpora agresiji je neizostavna kada govorimo o Armiji RBiH, tim više što kroz prizmu toga pitanja možda na najbolji način dokazujemo žilavost i spretnost bosanskog čovjeka da pruži uspješan otpor neprijatelju.

Izložba također predstavlja i devet dobitnika ordena heroja oslobodilačkog rata dodjeljenih ukazom Predsjedništva Republike BiH. Svi dobitnici ovog ratnog priznanja odlikovani su posthumno, a također su i dobitnici ratnog priznanja "Zlatni ljiljan" koje je u vojnim dokumentima definisano kao najviše ratno priznanje koje dodjeljuje načelnik, odnosno komandant Glavnog štaba Armije Republike Bosne i Hercegovine.

U svom obraćanju polaznicima seminara Uprave za moral Štaba Vrhovne komande Armije RBiH, u Sarajevu, 9. decembra 1992. godine, Predsjednik Alija Izetbegović je kazao: „Danas je najveća čast biti vojnik ovoga naroda. Lično osjećam da je to i moja najveća titula ako me neko smatra vojnikom ovoga naroda i ove vojske. Vi možda i ne znate to – jer često ljudi o sebi najmanje znaju – šta je naša vojska i kolika je čast biti pripadnik naše armije danas. Vjerujem da ne znate koliki ugled ta vojska ima u svijetu, kod prijatelja i kod neprijatelja (...)

Pojava i stalni uspon naše armije, uprkos svim teškoćama, smatra se danas jednim malim čudom u svijetu. Često me stranci pitaju kako uspijevamo da se opiremo. Osjećam ponekad njihovu želju da dođu među vas kao što sam ja došao danas, i da se neposredno suoče sa vama, da vas upoznaju, da na neki način dokuče tajnu tog otpora. U čemu je ta tajna? Ona je, prije svega, u osjećanju ljudi da se bore za pravu stvar, da se bore za slobodu i, možda više od toga, da se bore za goli opstanak...“



Orden heroja oslobodilačkog rata




Safet Hadžić



Mehdiin Hodžić



Hajrudin Mešić



Adil Bešić




Safet Zajko




Midhad Hujdur



Enver Šehović



Nesib Malkić



Izet Nanić

5.6.2022.

Godišnjica početka opsade Sarajeva



Opsada Sarajeva, glavnog grada nezavisne i suverene Republike Bosne i Hercegovine, počela je 5. aprila 1992. godine. Toga dana su ubijene Suada Dilberović i Olga Sučić na mostu "Vrbanja", a Sarajevo je ušlo u 1425 dana dugu opsadu. Cijena slobode je plaćena sa 11541 ubijenih, od čega su njih 1601 bili djeca.

Sarajevo kao simbol „čuda bosanskog otpora“ nije palo pod neprijateljsku čizmu, te uprkos nehumanim uslovima u kojima su njegovi stanovnici živjeli, bez redovne opskrbe električnom energijom, vodom, plinom, energentima, hranom i lijekovima, uspjelo je sačuvati dignitet u odbrani.

„Sačuvana Saborna crkva u Sarajevu i srušena džamija Ferhadija u Banjaluci, govore sve o nama i njima. Ovi kameni svjedoci ne lažu i mogu stati nasuprot sve njihove propagande.“, kazao je jednom prilikom Predsjednik Alija Izetbegović, referirajući se na sačuvan obraz tokom opsade grada, uprkos raznim iskušenjima kroz koji su prošli njegovi stanovnici.



Photo Credit: Admir Kuburović - Tesla

Sjećanje na Jovana Divjaka

Navršilo se godinu dana otkada nas je napustio Jovan Divjak, general Armije Republike Bosne i Hercegovine. Agresija na Bosnu i Hercegovinu ga je zatekla na dužnosti oficira u štabu TO BiH, a po stupanju u redove Armije RBiH, biva izabran na funkciju zamjenika načelnika Glavnog štaba Armije RBiH.

U Parizu je na francuskom jeziku objavljena knjiga njegovih razgovora pod naslovom "Sarajevo mon amour" (Sarajevo moja ljubavi). Osnovao je i ugradio sebe u fondaciju "Obrazovanje gradi BiH". Suprotstavio se srpskoj propagandi u manipuliranju srpskim žrtvama u Sarajevu, odbivši svaku pomisao na masovna stradanja Srba, ističući da su Srbi u Sarajevu pretežno stradali od srpskih granata, a da nad Srbima nije vršen planski ili sistematski zločin.

„Nema razlike između nacionalista - nacionalista je nacionalista. Za mene, nacionalista je pozitivna ličnost ukoliko se on zalaže za zaštitu prava svoga naroda, ali ne na uštrb drugog naroda. Ovdje se radi o nacional-šovinistima koji su otpočinjali i vodili rat da ugroze druge narode. To Alija Izetbegović nije radio.“, kazao je o Predsjedniku brigadni general Jovan Divjak.




Photo Credit: Milomir Kovačević Strašni/BBC

Godišnjica smrti Madeleine Albright

Bivši američki državni sekretar u vladi Predsjednika Billa Clintona, gđa. Madeleine Albright, preminula je 23. marta 2022. godine, u 84. godini života. Ostaje upamćena njena izjava: "Ja sam Sarajka!" od 30. marta 1994. godine tokom posjete ratnom Sarajevu. Tada je obnašala funkciju ambasadorice SAD-a pri Ujedinjenim nacijama, a njeno zalaganje je bilo usmjereno na konkretne korake oko ukidanja embarga na uvoz oružja. Tom prilikom se u Predsjedništvu susrela za Predsjednikom Alijom Izetbegovićem i bosanskohercegovačkim predstavnicima.




"Riječi gospođe Albright predstavljaju izvanrednu, snažnu i nedvosmislenu podršku, ili da upotrijebim njene riječi, "jedinствenoj i demokratskoj Bosni u jedinstvenoj i demokratskoj Evropi." Vi znate da je to gotovo doslovno naša formula.", kazao je Predsjednik Alija Izetbegović u jednom intervjuu iz 1997. godine.



Kolektiv JU Muzeja „Alija Izetbegović“ upućuje čestitku za 6. april – Dan grada Sarajeva. Tom prilikom je bio besplatan ulaz za sve posjetioce, koji su na poklon dobili kalendar za 2022. godinu.

Photo Credit: Shutterstock



Izložba fotografija "Alija Izetbegović, prijatelji i saradnici" pruža zanimljiv uvid u međusobne odnose Alije Izetbegovića i onih ljudi s kojima je Predsjednik održavao privatni i poslovni kontakt. Ljudi iz raznih sfera društvenog života, koji su, zajedno sa Predsjednikom, ostavili značajan historijski pečat u jednom od najtežih perioda po opstanak Bosne i Hercegovine. Fotografije su praćene izjavama i citatima koje stoje kao svjedočanstvo jednog vremena i odnose se na brojne svjetske i domaće političare, umjetnike, naučne radnike, sportiste i humaniste.

Alija Izetbegović o postu

"Post ima u sebi nešto istinski ljudsko, uzimajući ovu riječ u njenom boljem značenju. Naravno, to se ne može analizirati, pa ni dokazati, jer se radi o čisto ličnom osvjedočenju. Kada sam bio u zatvoru, u trenucima depresije kakva čovjeka u toj situaciji može obuzeti, uvijek sam se još gore osjećao kada se dobro nahranim. Glad mi je tada uvijek bolje pomagala od dobrog paketa od kuće. Jer praznina u duši i punoća u stomaku najgora je kombinacija. Zašto je to tako? Razmišljanja o ovome mogu doprinijeti da spoznamo suštinu ljudskog više nego dubokoumne filozofske rasprave o ovoj temi."



"Post u zatvoru - za mene je to bila potvrda mog ljudskog dostojanstva u danima i prilikama kada je sve oko mene to dostojanstvo ugrožavalo."

"Post se može definirati kao najjasniji pokušaj da duh vlada tijelom i da tu pobjedu zadrži i sačuva makar i privremeno. Mogu se u postu tražiti i druga značenja ili koristi, ali oni su očevidno sporedni, jedan odnos između tijela i duha i afirmacija ovog posljednjeg ostaje prvi i najvažniji smisao posta."

"Šta je post? To je neposredno doživljena borba između tijela i duše. U postu tijelo se muči, zahtijeva i ne dobiva, a duša je ta koja naređuje tu patnju. To je pobjeda duha nad tijelom, mučna, izravno doživljena pobjeda. Ako čovjek može na taj način doživljavati post, on će u postu naći zadovoljstvo, a ne samo mučenje."



Photo Credit: Fondacija "Alija Izetbegović"

Izložba "Nacionalno blago Bosne i Hercegovine"

U organizaciji Fondacije "Alija Izetbegović" i Nacionalne i univerzitetske biblioteke Bosne i Hercegovine (NUB BiH), 21. marta 2022. godine, svečano je otvorena izložba "Nacionalno blago Bosne i Hercegovine, izložba pisanog kulturnog naslijeđa iz Specijalnih zbirki Nacionalne i univerzitetske biblioteke Bosne i Hercegovine", koja je od 22. do 31. marta 2022. bila otvorena za javnost u sarajevskoj Vijećnici.


Na jednom mjestu predstavljamo ono najvrednije što baštinimo: od neprocjenjivih rukopisnih zbirki prepisanih stoljećima do prvih knjiga i novina štampanih u Bosni i Hercegovini, putopisa i arhivskih kolekcija bosanskohercegovačkih velikana. Po prvi put u 77 godina postojanja Nacionalne i univerzitetske biblioteke Bosne i Hercegovine Specijalne zbirke otvorene su za javnost na ovaj način. Autor projekta izložbe "Nacionalno blago Bosne i Hercegovine" je Amel Suljović, savjetnik za kulturu člana Predsjedništva Bosne i Hercegovine Šefika Džaferovića. Partneri projekta su Grad Sarajevo i JP Sarajevo, a sponzor JP "BH Pošta".

Izložba je dio zvaničnog programa obilježavanja 30 godina nezavisnosti Bosne i Hercegovine i održava se pod pokroviteljstvom članova Predsjedništva Bosne i Hercegovine Šefika Džaferovića i Željka Komšića.

Svečanom otvaranju izložbe prisustvovao je veliki broj zvanica, uključujući visoke zvaničnike Bosne i Hercegovine i članove diplomatskog kora.

Građane Bosne i Hercegovine kroz program otvaranja izložbe vodila je Maja Miralem, u direktnom prenosu na BHT1. Za katalog i promo materijale zadužen je bio Marko Jovančić koji je i zvanični fotograf svečanosti.

Katalog izložbe moguće je kupiti u Fondaciji "Alija Izetbegović" (info@alijaizetbegovic.org, 033/209-261) po cijeni od 20 KM.



Najave

Izložba "Alija Izetbegović - između Istoka i Zapada"

Izložba "15. april - Dan Armije RBiH" u Goraždu



JU Muzej „Alija Izetbegović“ i JU Muzej Tešanj najavljuju izložbu fotografija „Alija Izetbegović – između Istoka i Zapada“, koja će biti otvorena za sve posjetioce 6. maja 2022. godine u 17 sati, u prostorijama Opće biblioteke Tešanj.




U sklopu programa Dani otpora 2022. u Bosansko-podrinjskom kantonu u Centru za kulturu u Goraždu bit će postavljena izložba fotografija "15. april - Dan Armije RBiH" od 05.05.-14.05.2022. godine.



Ugodne bajramske dane želi vam kolektiv
JU Muzej "Alija Izetbegović"



JU Muzej "Alija Izetbegović" predstavlja
Zbirku ilustrovanih citata
Alije Izetbegovića **"Poruka sebi"**



Narudžbe možete izvršiti putem E-maila:
muzejalijazetbegovic1@gmail.com

ili na telefon:
033 574 271

Cijena: 20 KM

JU Muzej "Alija Izetbegović"



JU Muzej "Alija Izetbegović" predstavlja Zbirku ilustrovanih citata **Alije Izetbegovića "Poruka sebi"**.

Zbirka je obogaćena ilustracijama talentovane umjetnice Džejlane Karaman-Pašić, te predstavlja plod istraživačke aktivnosti Nađe Berberović – Dizdarević, direktorice JU Muzeja "Alija Izetbegović".

Citati su preuzeti iz autorskih djela Alije Izetbegovića, a tretiraju univerzalne teme: život, smrt, slobodu, ljubav, nauku, umjetnost itd.



Moja priča.